

Oqaaseqaatit nalinginnaasut

Umiarsualivimmiinnermut akileraarutit pillugit Inatsisartut inatsisaanni bruttotonip bruttoregistertonillu immikkoortinneqannginnerannik siunnersuut manna tunngaveqarpoq.

Umiarsualivimmiinnermut akileraarutit pillugit inatsit malillugu umiarsuit BRT-ertik BT-ertilluunniit tunngavigalugu umiarsualivimmiinnermut akileraarutissaminnik naatsorsuinissaq namminneq aalajangersinnaavaat. Umiarsuit BRT-ertik tunngavigalugu akileraarutit naatsorsorpatigit akileraarut minnerussaaq, tassami bruttoregisterton tunngavigalugu naatsorsuisoqaraangat umiarsuit usitussusaat nalinginnaasumik minnerungaatsiartarmat.

Umiarsuit amerlanersaasa siunissami BT-ginnarminnik nalunaarsortittarnissaasa ilimagineqarsinnaanerat eqqarsaatigalugu, siunissami BT-p umiarsualivimmiinnermut akileraarutit naatsorsorneqarnerani uuttuutitut atorineqartarnissaa naleqquttuussammat, siunnersuutikkut matumuuna anguniarneqarpoq umiarsualivimmiinnermut akileraarutit naatsorsorneqartarnerinut tunngaviit allanngortinneqarnissaat. Sulili BRT-ginnarminnik uuttuisitsisimasunik umiarsuaqarmat inatsisissatut siunnersuummi anguniagaavoq § 3-mi immikkut aalajangersagaliortoqarnissaa, taamaalilluni umiarsuit taakku umiarsualivimmiinnermut akileraarutaasa BRT uuttuutigalugu naatsorsorneqartarnerat ingerlatiinnaqqullugu. - Taaneqartullumi aammattaaq tunngavigalugit BRT § 2, nr. 3-mi § 4-milu taaneqartoq allanngortinneqarnissaa siunnersuutigineqanngilaq.

Inatsisartut inatsisaat maanna atuuttoq malillugu umiarsuit BT-minnik BRT-minnilluunniit uuttuisitsisimangitsut akileraarutitut akiligassaat Akileraartarnermi Pisortaqarfimmit missingersorlugit angissusilerneqartussaapput, tak. inatsimmi § 6, taamaattumillu aalajangersakkap taassuma siunnersuummi matumani allanngortinneqarnissaa pisariaqartutut isigineqanngilaq.

Naatsorsueriaatsip tunngavianik teknikkikkut allanngortitsinerummat, maleruagassat siunnersuutigineqartut kingunerisaannik akileraarutitigit isertitassat ukiumoortut allannguuteqarnissaat naatsorsuutigineqanngilaq. Paasisitsiniaanermut, naqitanut il.il. allaffissorinikkut aningaasartuutissat annertunaviangillat, taamaattumillu allaffissornermut aningaasaleeqqinnissaq pisariaqassanani.

Aalajangersakkanut ataasiakkaanut oqaaseqaatit

§ 1-imi nr. 1-imut

Imm. 1-imi siunnersuutigineqarpoq akileraarutinut akiligassap siunissami naatsorsorneqartarnissaani usitussutsip BT uuttuutigalugu uuttorneqarsimasup nalinginnaasumik tunngavigineqartarnissaa. Imm. 2-mi aalajangersarneqarpoq umiarsuit, bruttoregisteron kisiat tunngavigalugu usitussutsiminnik uuttortissimasut akileraarutinut akiliutissaat akit imm. 1-imi taaneqartut naapertorlugit BRT-imut ataatsimut naatsorsorneqartassasut. Ilutigitillugu ton-imut ataatsimut akileraarut aalajangersakkamut atuuttumut naleqquttunngorlugu apparneqarpoq, tassami umiarsuit angissusaat BT uuttuutigalugu uuttorneqarnerminni, BRT uuttuutigalugu uuttorneqarnerannit anginerummat.

§ 2-mut

Siunnersuutigineqarpoq Inatsisartut inatsisaata 1. juli 1998 aallarnerfigalugu atortuulernissaa.